

## REGLUGERÐ

### um breytingu á reglugerð um vöruhappdrætti Sambands íslenskra berklasjúklinga, nr. 372 25. október 1976.

#### 1. gr.

13. gr. breytist þannig:

- a. 2. másl. g - liðar falli brott.
- b. Við greinina bætist tvær nýjar málsgreinar, svo hljóðandi:

Ákveða má að við útdrátt vinninga í hverjum flokki skuli draga sérstaklega út tiltekinn fjöldi vinninga sem dregnir skulu eingöngu úr seldum miðum. Drátturinn fer fram með þeim hætti að stokknum er snúið. Ef fimm fyrstu stafir sem þá koma upp mynda tölu á bilinu 1 - 75.000 skal sú tala skráð. Telst hún vinningsnúmer ef happdrættismiði með því númeri er seldur. Valið skal endurtekið þar til slík tala hefur komið upp úr seldum miðum svo oft sem velja á.

Happdrættisráðið færir í gerðabók skýrslu um framkvæmd útdrattarins.

#### 2. gr.

Við reglugerðina bætist svo hljóðandi:

#### **Ákvæði til bráðabirgða.**

Ákveða má að í 10. flokki 1998 skuli að loknum útdrætti samkvæmt a - f - liðum 1. mgr. 13. gr. draga sérstaklega út tiltekinn fjöldi vinninga þannig að valdar eru tveggja stafa tölur. Drátturinn fer fram með notkun tölvu og í samræmi við ákvæði 13. gr. Þær tölur sem fram koma vísa til síðustu tveggja tölustafa í hverju miðanúmeri. Miðanúmer sem þannig er vísað til eru vinningsnúmer.

#### 3. gr.

Reglugerð þessi sem sett er samkvæmt lögum um vöruhappdrætti Sambands íslenskra berklasjúklinga, nr. 18 22. apríl 1959, öðlast gildi 1. janúar 1998.

*Dóms- og kirkjumálaráðuneytinu, 17. desember 1997.*

**Þorsteinn Pálsson.**

*Ólafur W. Stefánsson.*

## REGLUGERÐ

### um (4.) breytingu á reglugerð um búfjármörk, markaskrár og takmörkun á sammerkingum búfjár nr. 579/1989, með síðari breytingum.

#### 1. gr.

1. mgr. 1. gr. reglugerðarinnar orðast svo:

- 1.1. Búfjármörk eru: Örmerki, frostmerki, brennimörk, plötumerki og eyrnamörk. Skyllt er hverjum búfjáreiganda að hafa glögg mark á búfé sínu. Lömb skulu eyrnamörkuð fyrir lok 12. viku sumars. Skyllt er að brennimerkja eða plötumerkja allt ásett sauðfé og geitfé með brennimarki eða númeri lögbýlis eða eiganda, sýslutákni og númeri sveitarfélags. Að auki er heimilt að brennimerkja sömu númer og tákn á horn.

## 2. gr.

3. mgr. 5. gr. rg. nr. 579/1989, sbr. rg. nr. 410/1992 og 50/1994, orðast svo:

Við eigendaskipti skal frostmerkingarvottorð fylgja gripnum og tilkynna ber eigendaskipti til Bændasamtaka Íslands á þar til gerðu eyðublaði, sem Bændasamtök Íslands láta gera. Óheimilt er að slátra frostmerktu hrossi eða flytja úr landi nema vottorðinu sé framvísað svo og staðfestingu Bændasamtaka Íslands um hver sé skráður eigandi gripsins.

## 3. gr.

Á eftir 5. gr. reglugerðarinnar kemur ný grein um örmerkingar hrossa, er verður 6. gr. og breytist töluröð annarra greina til samræmis við það. Greinin er svohljóðandi:

- 6.1. Tilgangur örmerkinga er að tryggja sem best réttar skráningar, uppruna gripa og sönnun á eignarétti.
- 6.2. Eingöngu er heimilt að nota örmerki, tæki til ísetningar og aflestrar þeirra, sem hlotið hafa opinbera vottun samkvæmt reglum Alþjóðlega staðlaráðsins, þ.e. ISO/DIS 11784/11785. Bændasamtök Íslands veita leyfi til örmerkinga og hafa umsjón með framkvæmd þeirra.
- 6.3. Bændasamtök Íslands annast skráningu örmerkja og dreifingaraðila og alla meðferð og vörslu upplýsinga um framkvæmd örmerkinga á hrossum. Skylt er þeim sem annast ísetningu örmerkja að fylla út þar til gerð vottorð í þríriti þar sem skráð er númer örmerkis og auðkenni gripsins. Frumrit skal senda Bændasamtökum Íslands sem skrá upplýsingarnar í gagnavörslukerfið Feng. Afrit fær eigandi eða umráðamaður gripsins og eitt afrit geymir sá aðili sem annast örmerkinguna.
- 6.4. Örmerki skal komið fyrir undir faxrót í eða við sinaband undir faxrót, vinstra megin á hálsi um miðjan makka. Við örmerkingu skal þess gætt að fara vel að gripnum og fylgja viðeigandi leiðbeiningum við ísetningu og aflestur örmerkis.
- 6.5. Við eigendaskipti skal örmerkingarvottorð fylgja gripnum og tilkynna ber eigendaskipti til Bændasamtaka Íslands á þar til gerðu eyðublaði, sem Bændasamtökin láta gera. Óheimilt er að slátra örmerktu hrossi eða flytja úr landi, nema framvísað sé örmerkingarvottorði og staðfestingu Bændasamtaka Íslands um skráðan eiganda. Sláturleyfishöfum ber að gæta þess að ætíð sé lesið af örmerkjum og frostmerkjum hrossa við slátrun, til að staðfesta réttan uppruna og eignarhald gripa. Þá skulu eftirlitsdýralæknar gæta þess að upplýsingar samkvæmt örmerkingu séu ávallt skráðar á heilbrigðisvottorð vegna útflutnings hrossa.

## 4. gr.

Reglugerð þessi er sett samkvæmt heimild í lögum um afréttamálefni, fjallskil o.fl. nr. 6/1986, með síðari breytingum, og öðlast gildi 1. janúar 1998.

*Landbúnaðarráðuneytinu, 17. desember 1997.*

**Guðmundur Bjarnason.**

*Jón Höskuldsson.*

## AUGLÝSING

**um breytingu á gjaldskrá Orkubús Vestfjarða fyrir hitaveitur.**

Samkvæmt orkulögum nr. 58/1967 og lögum nr. 66/1976 hefur ráðuneytið staðfest eftirfarandi breytingu á gjaldskrá Orkubús Vestfjarða fyrir hitaveitur er taki gildi 1. janúar 1998: